

Ngā Paerewa Mātaaitanga

He 'matapihi ki ngā whare herehere' ngā mātaaitanga a te Tari Mātaaitanga, e tohu moata ana i ngā whakamōrearea me ngā wero e puta mai ana, e whakanui ana hoki i ngā mahi auaha, papai hoki hei whai mā ētahi atu whare herehere.

He wāhi nui tō ngā mātaaitanga e tirohia motuhaketia ai te pūnaha Ara Poutama.

Ko te mahi matua a te mātaaitanga whare herehere, ko te tautoko i tētahi taiao herehere e haumarua ana, e whita ana, e aro ana ki te mana o te tangata, mā te

- whai mōhiotanga mō ngā āhuratanga katoa o ngā whare herehere e hāngai ana, tae atu ki ngā pūtake hanga o ngā raruraru ka tohua
- whakataurite i ngā āhuratanga o te whare herehere ake me ngā mahi whakahaere ki ngā taumata ka tohua i ngā ture o tēnei whenua me te ao, me te
- tuku pūrongo me ngā tūtohinga mō ngā huarahi e whakapikitia ai te kōunga o te pūnaha whare herehere me te tautiakitanga o ngā mauhere.

Kei ngā Paerewa Mātaaitanga a te Tari Mātaaitanga ko ngā taumata tautiaki me ngā āhuratanga e mahara ana mātau me tutuki e te whare herehere. Ka raua atu ki ēnei ko ngā tūtohu ka whakamahia e ngā kaimātai i a rātau e arotake ana i te tautiakitanga o ngā mauhere me ngā āhuratanga noho o te whare herehere. Ehara ngā tūtohu nei i te rārangi whakatange, ā, kāore e aukatia atu ētahi huarahi kē e whakatutukitia ai tētahi taumata e te whare herehere.

Ka ārahi ngā Paerewa Mātaaitanga i ngā kaimātau kia tuku mai rātau he mātaaitanga motuhake, whakataurite hoki mō te tautiakitanga me ngā āhua noho o ngā mauhere i Aotearoa nei. I ngā mātaaitanga me ngā whakatewhanga, ka whai ngā kaimātai ki te tohu i ngā taunakitanga e ekea ana ngā paerewa.

E whā ngā tino mātāpono kei te ārahi i ngā mātaaitanga:

» **Haumarutanga:** kei te herea haumarutia ngā mauhere

» **Mana Tangata:** kei te arohia te mana tangata o ngā mauhere

» **He mahi whai take:** kei te āhei ngā mauhere ki te whai i ngā mahi whai take e whai hua ana ki a rātau anō

» **Te Hoki ki te Hapori:** Ka āwhinatia ngā mauhere kia rite rātau mō te hoki mai ki te hapori, kia whakaitia hoki te tūpono hara anō

E tohu ana ngā Paerewa Mātaaitanga me aro ngā kaimātai ki ngā āhuratanga 10 o te noho ki te whare herehere:

» Ko te taenga atu ki te whareherehere me te kuhunga atu

» Ko ngā rā tuatahi o te mauheretanga

» Ko ngā haerenga tautiaki me ngā whakawhitinga ki wāhi kē

» Ko te tikanga tautiaki

» Ko te hauora

» Ko te taiao

» Ko te pai o te āhua noho

» Ko te mahi whai take

» Ko te hokinga atu ki te hapori

» Ko ngā kaimahi whare herehere

Ka takea mai ngā Paerewa Mātaitanga i ngā Ture mō ngā Taumata Mōkito o Te Kotahitanga o te Ao mō te tautiaki mauhere ('ko ngā Ture a Nelson Mandela') me ngā Kawatau a te Tari Mātaitanga Mauhere o Peretania (ko ngā paerewa o Ingarangi mō te tautiaki me ngā āhuatanga noho o te mauhere tāne). Ka hāngai ngā Ture a Nelson Mandela ki ngā mauhere katoa, engari kua whakaritea hoki he paerewa ā-ira mō ngā Paerewa Mātaitanga e arohia ai ngā āhuatanga motuhake o te mauhere wāhine, o te mauhere irarere.

Ka takea mai ngā paerewa ā-ira i ngā Ture a Te Kotahitanga o te Ao mō te Tautiaki Mauhere Wāhine me ngā Tikanga mō te Wahine Hara (ngā Ture Bangkok) me ngā Mātāpono o Yogyakarta (e hāngai ana ki te aronga hōkaka me te iratanga) i whakaritea mai hei tāpiri ki ngā Ture a Nelson Mandela. Kei te mārāma a Te Tari Mātaitanga, tērā ka whāi pānga mai ētahi o ngā paerewa ā-ira ki ngā mauhere tāne, pēnei i ērā mō ngā kawenga o te matua me te tiaki tōmua i te hauora.

Ka hāngai ia taumata ki tētahi rānei o ngā Ture a Nelson Mandela, ki ngā ture Bangkok, ki ngā mātāpono Yogyakarta rānei.

Kei te mārāma te Tari Mātaitanga, kua nui rawa te tokomaha o ngā mauhere Māori i ngā whare herehere o Aotearoa, tērā i ētahi atu iwi. Nō reira, kua whakaritea mai ētahi paerewa me ētahi tūtohu motuhake e aro ana ki ngā hiahia o Ngāi Māori. Ina ka tirohia te tautiakitanga me te āhua noho o ngā mauhere, ka aro ngā kaimātau ki te whai pānga o ngā pūnaha me ngā mahi whare herehere ki ngā mauhere Māori.

Ko te arotake

Ka rite tonu te arotake i ngā Paerewa Mātaitanga kia whakaū tērā kei te hāngai tonu ki ngā hiahia o ngā mauhere o Aotearoa, ki ngā aratohu hoki a Te Kotahitanga o te Ao mō te tautiaki me te āhua noho i ngā whare herehere.

Ko ngā paerewa mātaitanga mō ngā mauhere katoa

Ko ngā Mātāpono Pūtake

Ka hāngai ēnei Mātāpono Pūtake ki ngā mahi katoa a ngā whare herehere, ki ngā kaimahi me ngā mauhere hoki.

1. Ka arohia te mana tangata o ngā mauhere.
2. Ka āta whakaritea te haumarutanga o ngā tāngata katoa i te whare herehere, arā ko ngā mauhere, ko ngā kaimahi, ko ngā kaiwhakarato me ngā manuhiri.
3. E kore tētahi mauhere e tūkinotia, ā, ka tautiakitia ngā mauhere katoa i te tūkinotanga, i ngā mahi whakamamae, whakaiti hoki, kāore nei ōna parahautanga.
4. Mehemea ka kitea ko tētahi mauhere kua tūkinotia, kua whakamamaetia, kua whakaitia rānei, ka tautokona ia ki te rapu āwhina ā-hauora nei, ā-ture rānei mehemea e hiahitia ana.
5. Kāore ngā mauhere e whakaparahakotia taiharatia, ka arohia ngā hiahia o ngā mauhere, tae atu ki te hunga e tino pānekeneke ana i ngā taiao whare herehere.
6. Ko ngā mauhere e kopakopa ana ā-tinana, ā-hinengaro, ā-aha rānei ka whai wāhi atu ki ngā āhuatanga katoa o te whare herehere, e rite ana ki ētahi atu.
7. Ka whai wāhi ngā mauhere ki ngā mahi me ngā hotaka hei whakarite i a rātau kia hoki ki te hapori, arā, hei tautoko i te huarahi tuku.
8. Ka whakatairanga ngā āhua noho o te whare herehere i ngā takohanga whaiaro o te tangata, i te mana tangata anō hoki.
9. Ka herea te mauhere, ā, kāore e wātea ki te hāereere. Kāore e tika kia whiua anōtia rātau i a rātau e herehere ana.